

靜軒先生文集

靜軒先生文集卷之六

序

送方進士歸省序

甲辰進士三百人觀政于諸司侯銓選幾一載矣今正月  
聖天子博采群議更新治道三百輩銓次居後者詔天官卿與  
之期俾各歸省于家宗孝理也吾新安與者四人方君勉仁在  
其列鄉大夫士僉謂舜民宜有言餞之夫

朝廷用人莫重于進士科非他流可比故其恩數亦異黃榜以  
張之宮袍以耀之宴于禮部以嘉之通其籍于金闕勒其名于  
璧水有司又爲綽楔以表其門世雖庸夫孺子罔有不知進士  
之爲貴者士之生斯世發身斯途蓋已千百而一二矧又得  
賜歸也君之此行其榮且幸爲何如舜民登第時嘗以使事過

故里拜家慶展丘墓會宗族鄉黨亦竊自幸矣然奉公有期不敢久處歷官迄今又閱六七春秋翹首南望猶昨日耳欲假便再謁重闈顧未可得又安能如君之

賜歸得以從容爲樂也君之此行其榮且幸又何如抑先正有言士當先天下之憂而憂後天下之樂而樂君之族自宋蛟峯先生而下文獻相望新安右族也君之才穎敏秀異甫弱冠已籍籍有聲驟掇魏科易於拾芥新安英才也而君之嚴慈永宗翁江孺人又偕老無恙君至止之日冠蓋戢戢拜伏膝下錦衣與綵衣相輝映于新安山水間可謂樂天下之樂矣然方今江以北饑饉比比而分陝尤甚流亡塞乎道途

聖天子宵旰惓惓分遣廷臣賑貸之所望乎列職中外殫心盡力以轉移之者亦惟吾進士科中人物而已君將出燕冀過河

間歷博平諸郡踰濟渡淮而南凡政之加於民者利若何而可  
興弊若何而可革隨所見聞熟思審處一一預爲致用之地而  
憂天下之憂可也不然今日之榮幸竊爲君不取焉君之志素  
遠大他日榮階茂績未易可量必非後天下而憂先天下而樂  
者因敢述此以爲將來之驗云成化乙巳春二月朔旦序

送胡進士歸省序

新安爲郡稱大好山水豪傑俊偉代不乏人我

國家垂統百年餘郡之士以進士起家者繩繩相望然屬邑有  
六績溪界在東北士非不學也而不與進士選者自洪武開科  
亦幾百年矣民登第時是爲成化戊戌新安同年者十有二而  
績溪於是有一人焉去年甲辰新安得第者八人而績溪於是  
復有一人焉夫績溪之山水之人物古今不異何寥寥百年一

無所遇自戊戌而甲辰僅七載耳四人者乃衰然出乎其間是  
非山水之運否於昔而人物之出盛於今與四人之中龍川胡  
氏居其二戊戌榜爲永年今官南京大理寺副甲辰榜爲文光  
永年族孫也於戲績溪得四人一邑之榮龍川得二人一族之  
榮矣今正月

聖天子更新治道教人以孝甲辰進士銓選未及者詔各歸省  
而文光與其列又何幸哉文光旣拜

命以嚴慈具在亟欲問起居治裝戒行不少緩鄉縉紳士共追  
餞之其姻友上林署丞程君又徵姪民爲言以贈姪民非善言  
者抑聞諸聖人矣不患無位患所以立今之進士有位而未立  
乎其位者也文光年尚富穎敏之資沉潛之學出流輩千萬一  
以發身斯途又當績溪文運之方盛由此而漸陟顯階不難矣

所貴者以忠孝爲大本勤慎爲實功廉潔爲定守使居位而克稱其位可也若夫今日之歸衣紆錦繡徒耀鄉閭之間他日之來品論銀黃無益嚴廊之上豈特爲績溪羞哉又豈特爲新安羞哉人將請進士科不足以得人矣昔張童子生九年自州縣達禮部一舉而進立乎出身之列及其隨父寧母也衆皆厚餽賂以遺之作詩歌以嘉之獨韓昌黎慕回路贈處之義而欲進童子於道無他念童子爲同門故耳今文光同鄉也幸知乎此勿厭舜民之喋喋云成化乙巳春二月丙子序

### 送陳教諭序

天台之黃巖陳先生希簡教諭吾邑幾九載矣今年春以疾業將求歸館下諸君子不能遽其去志適舜民謫官滇南順道歸省于家復偕諸君留之至再而先生之志終浩然不可遏於是

諸君不忍其去也相率徵言送之唯先生生天台右族學行夙  
成其起家也以丁酉鄉貢進士其在吾邑也以廉介持已以文  
學重于人以奇節高行激勵士氣至於析經辯議尤侃侃不俟  
故館下賴先生造就甚衆發身科第者視昔有加歷典山西四  
川福建三大藩文衡取士唯公唯明故所得皆懷輿論先是邑  
廟學隘陋頽敝甚先生既至以增修爲已任若泮池若鳴道軒  
則創始也若三賢祠若射圃亭若藏書閣則有故而湮廢非一  
日新之也若號房則因其舊而廣之也自大成殿以下莫不  
營之葺理之煥然一新他如砌朱子祠下庭石重造胡雲峯明  
經書院興起墜緒類此者不一未始以冷職自諉其費一出於  
先生已俸學者贊儀與夫役夫傭直有司之力居後矣故館下  
諸君子多其功不遠千里乞容某介卿陳先生爲記勒諸貞珉

以示不忘督學憲臣若斐君謙司馬君望旁觀列郡師儒儒於  
先生稱許不已其茲去也人皆冀其九載任滿奏最銓曹以資  
則當遷郡博爲太學以望則當擢有司涉臺憲庶使天下士人  
咸沐其政教之澤豈特一邑學而已哉以典天下文衡則四海  
英才悉在其衡鑑之下又豈特三大藩而已哉不謂其以微薦  
端爲此舉也雖然天台爲郡有山海之環富有川澤之沃衍上  
蔡桐江回浦諸書院黃山分繡參雲澄江諸樓閣亭館具在焉  
易曰山下有雷願君子以謹言語節飲食先生之歸體大易之  
義以順其神脫然不以一私自累暇則登是山觀是海商羊子  
是川澤從容幽討乎是書院樓閣亭館覽勝歛奇搜今索古使  
胸中之氣益充以雄則今日之恙可不藥而去他日事業之大  
可奮然復起爲之有饒力矣夫如是則天之疾于先生正所以



成乎先生也昔人有言雖外爲天下惜老成之去然私喜明哲  
得保身之全舜民之送先生意蓋如此若夫祖餞之際冠蓋車  
馬共張之榮與否舜民雖痛疾弗能出然有諸君子及司訓李  
君仁朱君英又有賢邑侯如藍君者在其不落莫也可知先生  
抑亦不以此爲輕重故不贅成化丁未夏四月癸酉序

族伯希文先生禱雨有感序

司巫舞雩所以禱雨也古之人或以德或以政不巫而得雨者  
亦多矣然必在位爲神人之主而此身所關者重乃可得之是  
故湯主天下禱桑林而雨魯僖主一國放佞理冤而雨徐州朝  
史百里嵩主一郡行鄒而雨西華令戴封主一邑積薪自焚而  
雨未聞有不在其位可以不巫而得之者不在其位可以不巫  
而得之其道無他一於誠而已若君族伯希文先生禱雨而應

是也先生族之儒者旁通于鑿平生一言一行非誠不立惟其誠故鑿投劑輒效起死回生如執左券探囊中物其於禱雨非素藝也歲乙巳旱鄉巫禱累日弗應先生觀之嘆曰太空冥冥非誠曷格乃屏巫率衆禱之不終朝果雨嗣是歲旱衆志必在先生先生憫農夫之望必從而禱禱必雨雨必流通今年六月旱賴先生一雨二日七月復旱先生適以鑿留于鄰邑鄉巫病弗效苗且稿矣族伯希明遣人要先生歸就壇禱之一雨者三日而雲霧霽然猶未怠也於是鄉人懷先生之惠族弟廷玉暨好事者又俾舜民爲文紀其績噫舜民身親見之矣其壇中畫八卦星曜之象則與古之檄召五星者相似凡名山古洞神之所必必命人往乞其靈則與古之禱于山川數澤者相似於古淵得青蜺甕而畜之則與古之盛蛇鑿貯蜥蜴者相似目必引

鄉之人焚香行道望空下拜又爲祝詞俾人行且誦以籲于天  
則與古之命小童壯舞者相似或獨坐自中跪而默禱則又與  
古之出野暴露者相似先生之禱其於巫初不甚異然在巫則  
不應在先生則其應如神何耶誠不誠之分也此誠一至大而  
動天地感鬼神小而信豚魚草木況於雨澤一事云乎哉使  
先生有位于時推此誠而行之則天下無旱歲矣舜民前年出  
按張掖辨死獄旱又得大雪人皆以爲喜偶然也初無先生之  
誠也鄉進士曰儼曰嵩皆先生之子指日有位與舜民同在仕  
籍凡治民事神之際舉當以先生之誠是勉成化丁未八月六  
日序

送藍處士還卽墨序

是士字子安婺源尹藍侯文繡父也侯以名進士來婺源幾

載迎處士就養者半載矣侯德化既浹于民官事暇略恪恭于  
職而處士一旦動張翰尊鱸之恩留之不可得戒行有日橋梓  
間甚不能情邑士夫僉謀所以餞之有謂處士當念侯之志再  
留數月者有謂處士之去當爲侯再來以慰其志者特舜民適  
以遠謫順道歸省于家乃諭于衆曰孝如曾參義不離其親一  
于外是固侯之志矣子之能仕父教之忠詎非處士之志乎昔  
歐陽詹遊京師將有所得以榮父母韓昌黎推原其父母之志  
謂詹在側雖無離憂其志不樂也詹在京師雖有離憂其志樂  
也昌黎可謂善言人情者矣狄梁公爲并州親在河陽登太行  
顧白雲孤飛謂左右曰吾親舍其下悵望者久之亦未聞其舍  
仕而養何哉蓋爲忠爲孝二者不可以得無也矧侯於此半載  
者滿隨以滑之脂膏以膏之既足處士之樂而卽墨之勝山高

海深風土甲於青齊侯之慈闈康寧兄弟無故處士之去亦足  
以爲樂者是處士在此則侯於羅長康之戲綠堂可以作而其  
去此則侯於王逢原之思歸賦不必爲矣視舜民重闈之歡永  
父而萬里之行在即者其爲情又何如且以侯之才之德豈直  
地方一同雷震百里而已哉近之擢臺憲陟巖廊遠之秉鈞衡  
調鼎鼐

貶封之榮祿養之貴有可必者是固侯之志亦處士之志也今  
日之再留與否及去而再來與否吾恐處士與侯之志亦必不  
屑屑乎此矣衆皆唯唯舜民遂筆之以爲行贈成化丁未秋八  
月戊子序

鴈門王氏家譜序

鴈門今代州王氏鴈門著姓此譜乃通判蒙化府王君所作其

先居河東元初因徙民實邊移東勝州東勝塞外世次失傳至  
遜菴者兄弟九人遜菴最少舉進士官終縣主簿君之高祖也  
元季兵亂東勝居民爲之一空曾祖默齋乃携家而南僑居鴈  
門

國家統一九有遂貫代州籍鴈門有王氏自默齋始大父養拙  
軒精於易以早年失恃立思萱堂孝名著於遠近父澹菴永樂  
中起家胄監授虞部主事陳言不如令謫判河南府歷官有清  
譽及致政構晚翠亭以自樂且有木菴者爲之弟友恭甚篤俱  
以天年終君兄弟三人木菴亦二子君又克繼家學致位今官  
君之子汝敬輩及猶子又凡十人且復有子及孫鴈門之派於  
是駸駸乎盛矣君念河東已遠東勝復淪於沙漠遜菴僅以名  
位著彼八兄者若名若字若行實若子孫皆不可考默齋之南

遷其不絕也如綫今三四傳而益繁且碩不有紀述以詔于後則祖宗遷移之艱既泯而子姓昭穆之分或淆矣此譜之所由作也譜之起斷自遯菴首之以世系次之以小傳其間生偶名號仕隱卒葬諸凡所載疑其疑信其信未始妄有所增綴既成帙適余謫蒙化出以見示且謂宜有言叙之竊惟古者族雖無譜而宗法之立百世不紊故在春秋時猶有文昭武穆之說自晉魏以門地用人士大夫競以譜自重然人心不古徃徃耻紹寒微妄冒顯著甚至張九齡與張說通譜杜正倫求附城南之譜郭崇韜且拜子儀之墓疏戚真僞不復可論先正有言宗法立則人知重本家之有譜正所以立宗法也彼庸夫愚人固憚于此若前諸子所爲陽若相繼陰實自絕不惟無補而宗法之壞甚矣在昔崔盧李鄭暨太原王氏爲五姓故凡王姓者皆祖

太原河東乃太原近地君之族出太原無疑也今家譜之名乃  
于此而不于彼且自遜菴以上不敢妄有所援君之賢方之前  
諸子相去遠甚後之人苟能因此而興水木本源之思使宗法  
不紊出則如遜菴忠孝一脉世濟其美則君之族由茲益大鴈  
門即太原五姓之稱不獨著於嚆昔矣君名大制字弘化別號  
省軒年方踰艾剛毅有爲他日崇階茂績所以光其前而裕其  
後者未可量也後之續斯譜者尚其有賴於君弘治戊申夏五  
月望日序

校正雲峯胡先生文集序

先生文集二十卷兵燹散逸往往傳錄者什不一二其全不可  
見矣先生七世孫用光暨其子鄉進士濬掇而拾之後先所得  
以篇計者凡百數爲前編又輯諸先達序記碑贊之屬爲先生



發者爲後編至於元史列傳及先生行實則爲附錄置之首簡也宰膠東藍侯幸先生之文僅存而未泯也請莆田陳先生師召序之將壽諸梓而以校正見屬舜民何人惡敢僭妄及此所恃者聞見於家君抑齋先生所錄新安文集舜民過鄱陽又得抄本于大方伯周公子建於是有以參互攷訂更其舊編而類分之如右焉詞義真贋可辨者居其一有疑似者兩存之不可攷者少雖一二字多或半簡皆闕之不敢益君夫詳畧不同則主乎舊本以別本增入而分註之且每類各虛其末以俟再有所得嗟夫先生去今百五十餘年道德問學之懿今天下學者所共仰著述諸書今天下學者所共讀固有不待此集而傳者矣僕此集不傳則夫爲先生之後君先生之鄉宰先生之邑者其責可也乎哉舜民雖無功於其先侯名章字文繡有功於

斯文不特此一事觀此一事其他可知矣弘治己酉春三月甲子序

瑞桂詩序

歲丙午墨水籃侯文繡以名進士宰婺源先是公署有桂二株高可二丈許侯既戾止每退食輒休其下越明年政通民和桂遂結子纍纍綴樹如葡萄然摘剝之味甘美可食邑薦紳暨諸士民喜相語曰此和氣之所召也競爲瑞桂詩以頌余遠謫過家家君抑齋先生裒其詩爲一卷命余序之以遠行弗果亦以一時一物之瑞未足爲侯輕重者又明年戊申余歷遷今官至冬復隨牒歸省侯飲余公署中覩桂子之結視前惟倍於戲異哉詩不可以不傳序不可以不作矣按爾雅桂一名木犀黃花者能著子以是言之固未爲瑞今茲之桂植數十年顧不結於

侯未至之先而結於侯既至之後謂之非瑞固不可謂之非侯之政之所感尤不可侯平易近民不苛不縱一舉措一號令務愜人情不爲赫赫之聲而民陰受其賜桂之瑞所以應之記曰政訟平則芳桂常生余於侯驗之矣否則不必結於今日凡有植之者皆可結不必結於侯之公署凡山顛水涯皆可結也或云侯之子田性質穎異齒未成童而器識已如老成人桂之瑞或應乎此余曰不然田人瑞也桂物瑞也田之瑞本乎一生操存之積與乎義方之訓桂之瑞本乎一二年間愛養斯民之篤二瑞皆侯之德之政所致者讀瑞桂之詩夷考侯之行事雖不知侯之有田亦必知侯之有後如田矣田他時所就其亦鄉林之一枝歟侯發軔仕籍顯融不日可至婺源一小邑豈能久淹瑞桂之詩將與甘棠之頌並傳無疑也余不敏姑書此爲辭

之引弘治己酉秋九月四日序

送上舍李君宗德還濟南序

朋友以人合者有合必有別別而送之古今通情也合有淺深則別有難易至於送之以言不生乎愛必生乎敬非率然者也濟南李君廷齡字宗德由太學上舍籍名銓曹有日矣一旦其父致政常德別駕公之命來視其兄太守公宗仁于新安邇邇不數月言還郡庠諸君子尹正輩以余將赴考功順道過郡相率徵言送之蓋宗德之爲人才質旣美學行充粹氣象儼然望之如蒼梧翠竹及其接物溫潤和平又如良金美玉有足動人者其於諸君子合之日雖淺而契誼實深別之迹似易而懷抱實難諸君子之送之亦由於愛敬無隆非特以太守公之故也余往歲嘗爲別駕公賦重恩堂詩知其有功德於民宜其

後昆之太又嘗見太守公在

朝歷官爲名御史以直道謫績溪累遷今秩凡其施設純以誠心行之清慎勤三事每求不愧于古人不愧于天地神鬼余爲仕籍實步其後塵爲御史與之同一道謫遠方與之同一坎壈比遷江右又與之同一推舉平生辱知愛亦不淺雖駘駘下足非騏驥之匹大率一險一夷相彷彿矣及見宗德又喜其爲別駕公之令子太守公之難弟合而別別而送送而必以言愛之敬之此心蓋有甚於諸君子者矧其以言見徵又安辭邪雖然昔之送別者若河梁詩陽關曲非無言也方之回路贈處之義則相去遠矣宗德暨諸君子皆有志于斯世者曰孝曰忠臣子大節今日之窮經他日之致用所立惟在乎此諸君子送別余苟不以此言相期待不過綢繆情緒留連光景而已使宗德行

而太守公見之歸而別駕公聞之不謂余之佞不可也余亦行  
矣姑書此以爲別而復合割自相視之張本云弘治壬子春二  
月下旬序

清遊唱和詩序

清遊唱和詩者乃文江周公子建守新安時與諸僚屬文儒同  
遊紫陽觀之作也其歲是爲成化己丑其日適當重陽同遊者  
幾人人各有作無作皆不可知詩之存共十有二首周公唱之  
諸君和焉予所識者武畧將軍于君文遠地官主事程君克勤  
訓導袁君則明暨公四人而已餘皆不識其出處亦不識其果  
同遊否若今山西憲使陳公汝礪以成化壬辰進士歲甲午知  
婺源徃返郡城始識紫陽去己丑己五六載蓋聞其事而追和  
之非同遊也觀之高士柯君本懋編次其詩爲一冊請鄉進士

福山孫廷器篆清遊唱和四字于其端珍藏久矣未有序其事者今年乃以屬予於戲紫陽亦一郡之勝重陽日東籬菊又富盛開詩之唱和其清如此則當時衣冠之叢聚壺觴之酬酢心目之舒暢絲竹不亂塵俗不擾其遊之清從可知矣周公政事之裕亦可見矣古云良辰美景賞心樂事四者難并蓋宦途之士公務旁午案牘紛紜往往借山水以化其鬱結若山簡之於襄陽習氏池庾亮之於武昌南樓桓溫之於龍山或置酒輒醉或與諸佐吏談詠甚至坐賓落帽亦不之覺雖人品高下不可例論然其夷曠之情翫然可掬千古一日也東坡云聊將詩酒樂一掃簿書冗周公與諸君此遊亦如是耳謂周公無先憂後樂之志而諸君有留連光景之私豈可乎哉獨惜自己且至今僅二十有四載以予所識者論之周公累遷雲南方伯今致政

居鄱陽程袁二君謝世已非一日惟于君一人頽然獨在欲求  
周公與諸君尋其舊遊而載唱載和固不可得欲求後之人踵  
其舊遊而載唱載和亦未之見焉吁感慨係之矣宜乎陳孫二  
公和其詩纂其編於數載後柯君又以求于序於今日也覽者  
幸不以多言見誚弘治壬子秋九月壬午序

新安春意圖序

廣西宜山秦君瓚字彥玉丞歙于今有年矣歙民愛戴之好事  
者繪新安春意圖以獻善鳴者各爲詩歌以詠歎其事訓導周  
君成進士何君勝又各爲文以序其後予過郡君復出以見示  
讀數四知其所謂春意云者周何二君發其義無餘矣抑其行  
實尤有未備焉姑以予之所見言之歙治附郡城政務煩劇令  
於此者每難其人况丞乎哉成化丙午予謫官還過歙時令朝



于京師君下車甫及一載攝政不數月庶事無蘊積之憂四境  
無煩苛之苦頌聲滿道恨其來也暮惜其位也下恐其攝也不  
久是猶春之方至品物皆知生意矣予竊敬之然猶以爲筮仕  
之初未見其終也嗣是而後歎民良有倚賴予雖奔驅仕途不  
得與君爲會每遇鄉人詢及郡邑未有不以君爲稱者及茲一  
過凡向之令簿頻更迭易而君獨巍然允爲斯民父母又得慈  
祥愷悌同寅協恭若豐城熊君實夫者爲之令長回視前日政  
益平而民益安頌聲益廣又恐其瓜期之將及而益戀之不已  
是猶春之旣深品物生意罔有不遂矣噫君何以致此哉蓋君  
之祖上海縣令公宗義父儋州訓導公轉世有清德家法俱在  
而君又處心平易處事平易奉上御下亦平易不苛不縱不諂  
不做不徇纖纖之私不飾皦皦之行誠有如春意之着物不覺

其然耳或者乃曰百里皆春令之能事也一丞獨擅春意不其過乎予曰是不然職以貳令於一邑事無所不當問古人於丞有是言矣旣云無所不當問則必無所不當行謂一邑春意無關於丞不可也或者又曰新安郡名也歛雖大邑而屬於郡丞之春意行乎一邑而表乎一郡不其過乎予曰是又不然九千仞之丹鳳自下升高七十日之黃龍從微至著古人於丞亦有是言矣君之佐邑績旣懋其將以一邑之春意進而爲一郡之春意所謂祥風甘雨家濡戶洽理有可必此繪圖者之深意也於是或者默然而退予遂書于圖次以歸之弘治壬子秋九月甲申序

潛川汪氏敬思流芳集序

吾汪之在新安多唐越公後若歛之潛川汪氏其一也諸汪莫

不有譜世系詳明至於生配卒葬年月地理瑣節細故備錄無遺若潛川汪氏之敬思流芳集又其尤矣斯集曰士良者初修於永樂甲午自述有序曰張宗曰貴孫曰文曦者續修於大順癸未雲南亞叅洪公朝宗時領鄉薦還嘗爲序之迄今又三十餘年族齒日繁實業日盛曰永銓曰顯彰曰德淳曰禎者懼其久而難續又卽舊集而重修焉蓋自永樂以來幾百年而修之者三凡其族先之蹟皆炳然在目所謂敬思者真不忘祖宗覆育之恩所謂流芳者真不替子孫紹承之緒潛川之族不其盛邪或者乃曰近世譜法率從歐氏非不欲若是詳且備蓋恐傳之世遠有弗勝紀然則斯集之修不無太過矣噫是何言也歐陽文忠公雖出廬陵而家于滁南北族屬不能以歲時通問故其譜中至有闕而無傳者又多與廬陵諸歐譜不合當是時文

忠之心欲詳且備顧安可得使其先有若士良之初筆若長宗  
貴孫文義之續筆而使文忠居永銓顯彰德淳禎之地五知其  
必不厭夫詳且備而故略之矣永銓顯彰德淳禎之上吾無間  
然而今而後凡出潛川者由一世而十世百世千世其必人人  
篤倫理厚恩義敦詩書紹箕裘思之敬也弗渝芳之流也弗墜  
使斯集續續于無窮謂之善學歐譜可也奚以異同論哉舜民  
驅馳仕路欲集本宗之譜而未有次第幸見斯集喜潛川之派  
世克象賢又感或者之論故叙之以驗其後云弘治乙卯七月  
戊寅序

正己軒詩序

休寧陸阜吳君以正名其軒曰正己所得諸士大夫詩文不一  
而足余既爲之箴矣後數日謂君之庭坐君之軒談論竟日不

特信其爲人之正凡軒中服御器物無不正者余之箴亦黥然  
在卷君正襟讀之畢復以詩序見屬竊惟從古聖賢用工於正  
已之學者尚矣其要亦惟在乎田內以及外由靜以及動由父  
子兄弟以及衆寡大小莫不以敬爲主一循乎規矩準繩之正  
而不陷於一偏一曲之私焉爾無他道也卷中詩文率能言之  
若余之箴亦頗盡之矣而君之求不已如此何哉噫余知之矣  
過求義理於身心未安遠引聖賢於典故未切也君隱者請以  
古人居鄉之事言之李愿之在盤谷安分處常不事進取龐德  
公之在鹿門躬耕壠上遺安子孫是則以守已爲正而不及人  
者也王彥方之仗義居鄉化及盜賊至號其鄉爲君子鄉是則  
正已而能正人者也董召南之隱居行義夜讀朝耕父母妻子  
安之至於狗乳鷄哺是則正已以正人而又能正物者也其

上也乙晉明之弟也感清河太守之言而同住是則未能  
自正而見正于人者也周處之改行從善能去三害是則始不  
正而終能正者也此其次也至若金鄉之柳勝包藏禍心害人  
利己而始終一出於不正民斯爲下矣上焉者正己之師範次  
焉者正己之醫藥下焉者正己之殷監也聞君在家庭事先人  
以盡思爲正事毋以盡力爲正事二叔以恭順爲正遇諸弟以  
友愛爲正教諸子若姪以讀書積善爲正在鄉黨抑強扶弱  
老尊賢濟貧愛恤孤幼一以禮義爲正方諸古人蓋出乎其上  
所謂正人正物之效駸駸可致若其次乃君之徒其下乃君之  
罪人矣尚其粹于義理進于聖賢使正己不爲虛名諸士大夫  
之詩之文余之箴舉不爲虛談可也君其勗之弘治乙卯冬十  
月二十有七日姻友某序

南州惜別圖詩序

人之相聚則意氣相孚笑語相洽德義相勉過失相規別則休戚相違習尚相遠形跡相踈聲歎相隔古今所以惜別者此之故也然惟君子爲能惜之蓋不生於愛必生於敬其情非率然者小人則始雖親暱終必相傾外雖交際內實相棄或有惜別之名非其情矣湖學費生愚字希顏有美質博學強記江西憲副吳公懷德氣嗣京生之妹婿也去秋與生同舉于鄉俱未利乃相率來公官所蓋姻婭之好別之久而始聚也越旬旬余暨諸同寅始見之其氣恂恂其儀濟濟其言則甚簡若有不得志者翌日再見微叩之亦侃侃答述但不苟耳凡在坐者莫不愛且敬焉未幾念其嚴君若園先生垂白在堂遽買舟東歸吳公不能留特繪南州惜別圖以餞之諸同寅各賦詩于下方詩各

道其情蓋強於愛敬之兼隆不但以吳公姻婭之私也余因酒而告之曰坐湖學之彥也志稱儒風盛於東南自湖學始由安定先生教授之餘學者經義時務往往足以名世至於詞章乃其餘事姑以今日忝同寅者言之吳公固其表表若憲備陸公用節憲副談公時英憲發沈公廡夫皆生鄉之長者文章政事舉出入右一臬司之盛有如此彼建功立業著於既往而今崇階茂績立於廟堂列於諸司者未暇數也然則自今別去舊澠池之翼繼諸公而起與之頡頏以爲湖學之光者舍生其誰耶昔人有言士別三日當刮目相待生如不忘惜別之意此圖也此詩也誠是爲後來刮目之張本矣若夫惜別而明出處之義慕忠孝之節崇禮義廉耻之風更相戒飭以彷彿乎回路贈處之義此又出於圖與詩之外者生與吾濟均勗之可也吳



公曰子之言良是矣遂序以送之弘治丙辰春正月乙未序

送憲僉胡君朝賀

聖節詩序

古之人臣所以祝其君者多矣若堯觀手華則華封人有三祝之請鹿鳴諸什燕賜其臣則其臣有天保之頌召公受策命則致虎拜稽首天子萬年之恭逮漢高祖唐太宗置酒爲太上皇壽則群臣殿上皆呼萬歲漢武帝登嵩山則吏卒咸聞呼萬歲者三封泰山則兒寬奉觴再拜上千萬歲壽皆因事致祝或受恩無可報謝但言使其君壽考而已未始祝生日也唐玄宗始以八月五日爲千秋節而張九齡有金鑑錄之獻嗣是而後生日之祝歲爲常典宋之節曰長春曰乾明曰承天曰乾元曰壽聖曰同天曰興龍以及有元表箋祝獻之盛至矣極矣惟我

太祖皇帝酌古今之制順天下之情

聖節之名一定不易自五品以上表文有式而謏詞無所施自  
拜臣外朝賀有定員而位卑不得達者惟稽首拜於  
光天化日之下

聖聖相承百三十年于茲固有更張七月三日乃今  
上虹流之辰也僉憲西蜀胡君茂之以次當奉

表北上三司僚友拜送于城東之歸化寺舉酒爲別憲長西軒  
陳先生有作諸君繼之

聖壽之祝太平之頌與夫惜別之情期勉之意莫不備見於吟  
咏間辭民思致拙甚一時不能詩乃淳白於君而告之曰君臣  
朋友皆以義合者事君忠交友信二者一於誠而已

聖人在上海內群臣孰不肅稽顙舞蹈之儀展山呼萬歲之敬

王事賢勞同官君子孰不供張以致餞贈言以寓情然非忠信之大者必也食其祿不敢隨其政役其民不敢漁其利操其法不敢縱其奸真使輿圖安於磐石壽於箕翼而

九重無西顧之憂以永太平之福夫然後爲忠之大不以進取相期而以過失相規不以勢位相軋而以德業相勉不以口耳相驩而以肝膽相屬真使同僚之契交承之分有兄弟之義而同寅協恭和衷之美復見於今日夫然後爲信之大吾儕之所以贈君君之所以處吾儕其道不越是矣君學博而才膽識遠而器宏非淺之爲忠信者其將有取於斯言否也陳先生曰是足以爲序矣詩云乎哉因敢僭錄于群玉之首弘治戊午春三月下西朔序

送按察使西軒陳先生朝京詩序

明年己未適三年朝

覲之期雲南遠萬里司府長吏率先期而往按察使西軒陳先生戒行有日鎮守太監劉公明遠總戎黔國沐公希召巡撫都御史張公汝欽巡按御史余公誠之僉以邊徼務重議欲上疏留先生以靖軍民者先生曰述職人臣大節且在堂有九十之母順道歸省人子至情也吾何心於此劉沐二公知先生不可留各製詩一章以寓別意濱行三司僚友餞于東郊亦各有作而退舜民爲之序時文武屬吏郡庠師生暨境內之父老童穉垂髫戴白爭擁于車下以送有惜先生何不曲從當道諸公之留者有嘆先生洗冤澤物之仁未及一載而遽去俾其失所賴者有直恐先生德望素著必荷

聖天子簡擢陟于臺省而區區雲南不復得覩馳馬之臨者蓋

雲南古西夷靡莫之屬自歸

皇明百二十餘年生齒日庶以富然夷漢雜處吏于此者往往從其俗少寬假之先生自下車凡所設施一遵正法惟嚴惟謹而仁恕之意默行乎其中無利不與無弊不革未嘗一毫目循于舊鉅政細務莫不煥然一新而尤殫心於獄事多所平反此其所以按治未久而名實加于上下沛然莫之能禦也夫雲南之人所以望乎先生者如此其至先生之所以副雲南之望者宜何如而後可古者五年一朝皆畿外諸侯因朝聘以爲貢賦之節而虞典三載考績三考黜陟幽明總見于咨命一十二相之後周禮太宰三歲大計群吏之治而誅賞之與小宰所聽所弊所刑于群吏者皆屬於天官惟我太祖皇帝奄有華夏合天下疆宇而郡邑之雖分直隸各布政

司而貢賦歲有定度武綴之外吏皆資授無畿服內外之或殊  
故損益帝王隨時制宜三年一朝而黜陟誅賞之典太宰所  
掌雖仍天官而小宰所司則屬都察院部臺相埒體統相維所  
以治更

列聖而在上者尊嚴清明在下者聳動警飭不敢少易紀律若  
按察司則外臺所在一方群吏之治所繇以聽以弊以刑者也  
先生行將相吾

君贊吾相以受歲會尚念遠方之吏人才難得遠方之民良吏  
難逢獻公議執公道務彼攷覈於已然者惟去其甚銓補於將  
來者必拔其尤苟如此則吏有所憚而修其政民有所賴而修  
其業先生雖顯擢而去雲南之人實沐先生之德澤于無窮劉  
沐二公暨諸僚友之作亦足爲他日去思之驗不但惜別而已

先生字汝礪應城簪纓世家其初舉進士令吾婺源也遺愛在  
民至今不能忘去思之碑巍然星渚上若舜民則繇先生舉而  
進之諸生之列以有今日且幸從僚末皆先生教養之力也故  
于先生之行不敢以諛獻而以正對如右云弘治戊午夏四月  
朔旦門生某序

送提刑李君整飭荆南兵備詩序

兵備之設非舊也繇承平日久軍政弛人僞滋凡絕徼僻壤雄  
關險塞與各按察總司相遠御史暨各道提刑又巡歷有時不  
能遍及以致各屬無所警懼典兵者私縱而公虐典倉糧者蠹  
蝕而漁侵典獄訟者枉抑淹滯不啻肉鬻而草刈夷民無賴玩  
法梗化初欲推墮貽患于地方者不一數十年來  
廷議往往增置提刑憲臣請給

璽書俾專兵備之任燕以倉糧獻訟一有小警輒許調發付界  
可謂重矣故非其人不足以克是選施州等衛所隸荆南道背  
接辰沅綏連荆蜀與蠻獠犬牙誠楚之西塞也頃缺兵備適  
余同寅僉憲李君希顏以雲南父母壽邦疏乞迴避天官卿卽  
奏君補其缺將行三司僚友慨雲南之失望而喜荆南之有託  
相率賦詩餞之不但惜別而已蓋君天彭偉人學博而才膽起  
家進士嘗爲池州推官以治行卓異擢南臺監察御史風裁尤  
勃勃然其初來雲南也卽署金騰兵備幾一載所以肅百僚而  
貞百度者罔或少縱諸夷民各得其所至今賴之茲往荆南特  
輕車熟路耳勿厭其地僻當如瀘溪周先生之在廣東雖人跡  
所不到亦緩視徐按以洗究澤物爲已任勿厭其俗惡當如何  
道夫之在潼川諭以詩篇而教化寓焉俾強暴者聞而知悔勿



患各屬之多謬當如鄭丙之在廣西論因立功俾足以折獄而  
贖過勿患椎髻之醜易於爲逆當如楊誠齋之在南粵養威蓄  
銳警報一至奮仁者之勇往平其變脫或疆陲無故而守臣邀  
功以生事則謝師稷嘗在湖北矣効守臣恤戰士憲典具在舉  
而行之有何不可此余輩今日所望於君者若謂繼此而陟崇  
階弘茂績以滿天下之望則公道有在亦君之能事自有不期  
然而然者矣馬用賢弘治己未春二月甲午序

送竇文林先生報政詩序

三山林先生孫珍之副鎮臬也七載矣攝司事者居半執法仁  
恕屈抑多所平反監試事者三論秀公而明憲貴三藩之士中  
選者固協輿情其不偶者亦無刺議承制文卷者亦三疏剔積  
隱隨所駁而條答之畧無壅滯出境抵貴陽鞠大獄者一不苛

于法不爽于情上下咸稱允當至於清戒一事則始終無之  
詢衆證披尺籍人不敢欺而邊戍卒以充實之數者皆公家大  
政人或有求之而不得與亦或有避之而不肯爲又或有不求  
不避而行之不得其要往往債事招物議貽終身之羞者先生  
一切以無事處之而其績之茂如此可謂難矣是以巡撫都御  
史華亭張公汝欽巡按監察御史綿州金公舜舉遂寧徐公拜  
憲先後交章薦之非溢美也蓋先生以天順甲申進士始厄日  
有退食于家者一十五載偕其弟監察御史拜玉貢士廷圭自  
相師友時稱三鳳鄉之後進翕然宗之凡所以講求義理商確  
治道明體以爲適用之地者非一日迨其中年起而擢秋臺金  
外憲以至今官文章政事大非流輩可及其所抱負者有本故  
也抑亦造物者有以默相之耳不然何厄先生於數十年間

信之於數十年之後又何其諸弟今皆不壽而獨厚於先生之  
一身邪茲將奏績上考功鎮守重臣暨三司僚友競相賦詩以  
贈俾舜民序之夫先生之績炳炳在人耳目懋官懋賞固有不  
待考而後可致者豈非秉銓衡者用人以資而不以望故勞先  
生之一行乎抑又造物者將降大任於先生故少遲之乎皆不  
可知也用敢述其梗槩如右庶公論不昧而公道亦有在矣不  
識先生以爲何如弘治己未二月望日序

靜軒先生文集卷之七

序

滇陽餞別詩序

滇陽餞別詩凡若干首雲南藩臬諸僚友追送姚江拙庵毛石之作也弘治乙卯君以雲南左叅政奉鎮巡大臣檄調軍兵督諸議衆誠戮力不避艱險克平四十年不平之孟密使其格心向化歛貢于

朝廷不復敢肆跳梁之狀厥功茂矣夫何說詎傾軋疑似賄之誘情狀未明幾致奇禍雖君詞嚴義正連章抗論

聖天子特遣近臣鞠驗無實猶坐檻發隴川第喪兵及用歸江差發銀供軍餉頗兵于戛勒失火傷人降君秩一級聞

命之日雲南無老羅貴賤罔不爲君扼腕太息而君乃怡然曰

處豈非志士有心於立功無心於徼利乎既而以未有銓牒欲  
歸慰老母倚閭之望適部憲白洲李先奉

命南巡審知君才賢誠有功而無過乃借元戎黔國沐公具疏  
萬里赴上爲借寇之請君去志浩然不少待諸僚交之作所以  
不能不拳拳於餞別時也於戲昔馮奉世出西域嘗矯發討國  
兵擊莎車時宰議沮其賞矣未聞貶其秩者蓋忠義奮發勝敵  
安邊之功不可泯也君因重兵壓敵境而糧發援兵視事世率  
爾矯發者有間汲黯過河南嘗以便宜持節發倉粟賑水旱矣  
未聞議其事者蓋忠臣惟知固邦之本不知恤身之危其義不  
可尚也君以軍餉用官銀視贍之義爲尤急誓彬伐北漢塞邊  
兵法右倍山陵前左水澤之訓頗與甘泉池以致暑雨疫癘  
未聞以此被譴者蓋天時地利非人所能巧奪也君之勵成于

火天邪入邪較是數者君有功而無過蓋了然矣或詰余曰近日鞠驗子不親其事乎何不以此白之余則應之曰覈虛實而無隱鞠事者之直也辨功過以上請當事者之責也視斷案以行法

朝廷之公道也論事明大義持大體不沒人善士君子之公論也矧君佐大夫忠襄公嘗以邊事盡節君服家教有素矢心徇國非小小利害所能挫乎若李先生之言既達則

聖天子之從諫用賢又不卜可知矣余不能詩者敬書此以弁群王弘治己未秋七月既望序

都門別意詩序

弘治乙卯秋七月外以江右按察僉事朝賀

聖節履素黃君以江湖之彥素裝遠遊同寓于京師君言動不

凡所交際率皆賢達縉紳士旣而言去惜別者競賦詩餞之輒  
爲一卷考功主事李公惟誠又書都門別意四大字于其端以  
序見屬時余亦將南還行色匆匆未有以應也比過家復至江  
西遂拜雲南之

命隨牒萬里徼臬多事筆硯不以時近竟致因循歲戊午君在  
嶺表去雲南凡幾千里乃有荳蔻香品之寄余心雖惘然尚乏  
一言以達其意吁可怪哉今年余又捧

聖節表文北上舟次潞河翹首都門咫尺恩仍與君握手一  
談不知琴劍所適將於何地徒佇浩嘆而已顧其卷在行囊  
無恙於是索筆爲之言曰喜合惡離人情之常也古今人別必  
以餞餞必以地飲之以百壺唱之以三疊感之以涕泣雪之以  
詩章勉之以功名事業而資之以餽贍行李留連纏綿不

情高然可掬然皆不及顏仲二賢何以贈我何以處我之義之  
爲至也君好禮尚文清修純雅挺七尺之軀抱四方之志南遊  
于粵北于冀寓京師不數旬乃能使嘗所交際者不忍之別如  
此方其出都門車馬駢趨冠蓋擁集所以飲之唱之感之宣之  
勉之資之者無所不至視古之餞送于屠于河梁于渭城于南  
浦者千載猶一日矧余嫺黨不忍別之情固不異乎衆越今五  
六載復造其地而不以時晤方寸中千緒萬端汨汨紛紛鬱莫  
一遣則又非衆情之可及矣若夫在官則公恕廉勤出處以正  
雖造次顛沛而不忘乎國爲客則恭儉忠信動定有恆雖孟浪  
遨遊而不忘乎家此余與君久要之論不待都門臨別而後以  
此爲贈處者也欲希顏仲二賢亦不過此但求別後再會刮目  
相視而無愧作可焉用敢以此引之如右君名新字思高後素



其別號世家吾郡休寧之五城云

孝友堂慶壽詩序

弘治庚申九月二十有一日休寧之孚潭許姓黃孺人春秋八十誕辰也孺人出黃村歸于故處士永高公黃許皆詩禮鉅族孺人性貞靜自早年以勤儉佐處士起家奉舅姑與妯娌遇內外長貳下及婢僕以孝謹淑惠聞生丈夫子四長尚隱次尚安尚志尚禮皆讀書明義理更相縻縶往來江湖間交際名鄉碩士盛有時名皆處士逾下壽即捐館日月云過而訪隱昆弟無頃刻不盡思尚志以未送終追慕尤至感動士林共爲望雲思親詩卷以表之孺人在堂左右就養罔不盡力而女早世其撫其孤恩意惟篤諸孫趨膝下又皆俊異不凡孺人樂之家庭內恒雍穆和氣可掬也余第三子愈鄒托尚志求序之世宗憲

會憲翁喜孺人享此高壽又喜孺人有此賢子若孫乃名其堂曰孝友而以堂中慶壽十事分爲十題預命鄉進士弟天民濟民及拉余族在仕籍者各詠一律俾余序以慶之世以詩文慶人壽多矣未有以孝友名其堂而詠之者家君之意豈不以壽爲五福之首壽矣而諸子不能孝孺人曷從而養其壽孝矣而昆弟不能友孺人曷從而安其壽詩曰兄弟既翕和樂且耽孔子贊之曰父母其順矣乎由是觀則孺人享壽莫大於得尚隱昆弟之孝友家君慶壽亦莫大於以孝友名其堂矣其諸甘羶脩隨之奉與夫祝詞餽獻之盛皆餘事也今而後孺人之壽益高而不老尚隱昆弟之孝友益篤而不替家君所以名堂之意益信而可徵矣登是堂讀是詩是文者必不以遠於事情見誚是歲夏六月上旬序

送幸菴彭先生詩序

幸菴彭先生知徽州府事未期月適當三年一朝之期治裝將北上徽之士民皆曰君侯之來躬行孝悌而化本立矣政肅大綱而萬目張矣事急先務而百廢舉矣鞭朴不濫而刑罰簡矣苞苴不至而利源清矣請託不行而公道昭矣侈靡不恣而弊俗革矣冗盜不起而善良安矣異端不作而正學崇矣今茲遠行雖暫也不易舍也自黃童以至白首言人人同郡邑庠生鮑徵吳儒等凡十有五人爲詩一章共爲一冊其前爲黃堂化雨皂蓋朝天二圖特詣紫陽志局謂舜民曰諸生受易於先生乃士民中感之尤深別之尤不易者也吾子見知於先生有日矣幸爲序之於乎讀易非難體易爲難幸菴之孝友其家人之父父子子兄兄弟弟夫夫婦婦而家道正者乎幸菴之立政其

無妄之茂對時育萬物者乎幸菴之起廢其允之說以先民民  
忘其勞者乎幸菴之省刑罰其旅之明慎而不留獄者乎幸菴  
之遠苞苴其大壯之非禮勿履者乎幸菴之謝請托其邇之遠  
小人者乎幸菴之革侈靡其節之不傷財者乎幸菴之息冗盜  
其萃之除戎器戒不虞者乎幸菴之斥典瑞其既濟之思患預  
防者乎若幸菴者其將爲坤之大臣厚德載物者矣所謂黃堂  
化雨乃蒙之養正坎之習敬事所謂皐蓋朝天乃乾之飛龍在  
天利見大人觀之利用賓于王之時也生輩爲此圖此詩以贈  
行其情善矣然而幸菴之心所以望生輩者或不在是繼茲以  
往生輩其必如允之麗澤講習如益之見善則遷有過則改如  
大畜之多識前言往行以畜其德使幸菴至止之日刮目相視  
不有感於今日此詩此圖之贈乎若夫幸菴念士民重望還郡

之期可數日以待生輩宜無汲汲也弘治辛酉秋九月二十有二日序

徽州府志序

并小序

徽州府爲古新安郡郡之有志者興於梁蕭幾王篤之記歷百餘年有唐之圖經又三百五十餘年有宋太平興國之廣記又三十餘年有大中祥符之新圖經又百五十餘年有淳熙乙未羅鄂州願之志又六十年有端平乙未李教授以申之續志又八十餘年有元延祐己未洪縣尹焱祖之後續志及

國朝洪武丁巳則又幾六十年矣自新圖經以上不復可見於是衆禮侍同乃彙括三志會而續之以爲一書迄今又百二十餘年中間景泰成化前守孫公遇周公正兩經增集簡畧弗傳所得者惟洪武志夫志大事郡之山川人物典章儀度於其時

萬志之作否視守之賢否何如爾圖經廣記及洪武志皆出詔  
編若羅志則成於趙不悔李志成於劉炳洪志成於朱霽晉蕭  
養皆賢守也學不憚者不能爲才不優者不暇爲識不遠者昧  
於取舍爲之苟且見不定者沮於旁議爲之遷就蓋一登下冊  
斯垂不朽而名者衆之所趨此其爲之所以不妨弘治庚申刑  
部郎中彭公澤來知府事明年政通人和適舜民丁內艱里居  
讀禮汲汲舉志事見屬回以憂辭而使幣繼至家君抑齋翁最  
之曰鄉先正朱文公丁常齋憂遵遺訓棄學于胡籍溪劉草堂  
劉屏山之門且遷居以奉母其丁祝碩人憂日居墓側旦望歸  
奠几筵日成喪祭禮又推之冠婚共爲一編命曰家禮蓋事有  
關於遠且大者非忘哀也今汝既襄事以我在不當居墓側而  
鄉公實舉百年義與苟能心不忘哀將往以成其美則吾宗與

吾鄉之文獻並與表章之列未必非孝也吳祥之有不得已休  
弟鄉進士天民儒士生民振綱簡司以往則彭公與同知三山  
李公燁通判睢陽陳公理推官緩臺梁公繼和秉協議之機六  
縣賢令樂清朱君諫倚氏君敬平原區君瑄江夏韓君伯清  
文安張君偉鄱陽胡君漢傳採訪事跡各有報章又召教授蔣君  
湜教諭鄭君宏王君傑江君鉄訓導唐君昂中君文昌韓君洪  
卿徐君炯王君介及庠生汪泮楊瑄程敏亨程堂汪本汪潮胡  
相任榮俱在開局紫陽觀以遠市蠶本之舊志衆之史傳及諸  
家集錄與夫金石之文編摩問鄉塾師王宗植至得景泰集本  
時周公以雲南方伯致政居鄱陽縣公乃馳書以請又得成化  
集本且間請教于致政禮部右侍郎祁門康公永韶由是舉凡  
立例凡所當錄者不知則已知則不取少遺其所不當錄者一

毫不敢少徇而四閩月次第就緒而迄者乃匿名以應語  
彭公曰惟求其是而已勿恤也又閩月而編始成可謂難矣  
民因此益嘆羅李洪朱數君子者為不可及而歷代所以履  
而不舉者無足怪也今日之事使非彭公學之博才之優識之  
遠見之定而徒恃區區之淺陋曷克底此既擬句將壽諸梓敢  
述所由以俟有道君子正焉彭公字濟物號菴長沙世家寓  
居金城起家名進士云弘治壬戌三月朔旦郡後學汪舜民序  
小序

### 地理

本府之地自漢末分縣為新都郡疆域廣大後稍割之益  
歛地之在今者為歛為休寧為婺源為績溪為嚴州之淳安  
安古黟地之在今者為黟為祁門為池州之石埭凡三府九縣



而本府六縣所存惟唐歙州新安郡境而已然建置之久山川之雄分之以鄉都鎮之以城池據其形勝而同其風俗自昔及今凡隸此地者或廣狹遠近分合興廢盛衰不一也不有紀載則後何所考乎爰志地理

### 食貨

本府萬山中不可舟車山地少戶口多土產微貢賦薄以取足於目前日用觀之則爲富郡一遇小災及大役則大窘故自唐以前貢賦率輕下至唐末吳楊氏及南唐僞祿一隅征歛無節甚至取硯亦有專務宋興未能盡革南渡後仰給惟江南諸郡至於酒醋之權亦有專官專庫元賦雖不增而額外又有金鐵諸課民不聊生我

國朝稽古定制貢賦有常而額外無名之征一切革罷自餘年

間斯民獲享太平之福近者軍需稍增民遂告乏不紀其實則後之考民物考貢賦者何所據乎爰志食貨

### 封建

本府僻在一隅山窮水淺本非封建之地故歷漢及唐宗室雖封或立其國而隨廢或取其號而不居唐以後亦不復有封號矣至於戚畹尤寥寥僅見之也不紀其蹟則後之議藩封者何所擇乎爰志封建

### 職制

本府自建置以後方兵民之未分也統治于郡邑之官及兵民之既分也民屬于郡邑兵屬于翼衛之官矣又有上官不時巡督以統制之官得其人則兵民皆安否則皆病惜乎世遠志缺而

國朝自洪武後志旣未續故老凋謝案牘又復散佚其姓名治  
行幸存而可見者失今不紀則將來益無可徵矣爰志職制

### 公署

本府在昔建官設屬必各有所居以出政令又必各有解舍爲  
退食之處宋元以前官旣冗雜事尚苟簡佐貳下僚多有就居  
民間者惟我

太祖高皇帝法古建官繁簡得宜于公署之立亦莫不備洪武  
二年詔天下各官解舍各置於公署旁周垣之內其制密矣承  
平日久居官君子志向不同或未壞而厭其陋惟事改作或已  
壞而憚其難惟圖苟安孰與於相時而動不傷財不勞民遇有  
損壞卽如葺理者之爲得中乎凡建創規模及其歲年詳著而  
備錄之後之君子必肯審於此矣爰志公署

# 學校

本府在唐郡邑始皆置學故前志載州之廟學自唐及宋在城東址隅是已世有治亂學有興廢唐學盛矣其制之詳及士之出于學者世遠不可考五季學校不修招選道缺宋初書籍散佚乃即師弟子所聚書院賜以九經并釋文之屬又詔齋七經疏義并三史於杭州摹傳之而後家始有書仁宗詔諸路州軍監各立學學者二百人以上許更置縣學而後郡邑始有學下湖學取胡安定條約著爲令而後學始有法凡學又皆有田以爲養徽之貢士亦日盛然教授之設止於州學而已元雖置路州縣學教授學正教諭學錄及書院山長然有教人之名而無得人之實惟我

太祖高皇帝建立府縣廟學悉有成式既置教授教諭又各置

訓導既有廩生又各有增廣生餼之以廩祿頒之以官書肅之以卧碑

列聖繼作復條學規專憲臣以提督之科貢二途得人之盛胥此焉出有司作興英才日衆附學生員倍於廩增士生斯世可謂幸矣雖然學以明人倫也發身科貢以明體而適用也非富貴聲利之場也凡遊於斯者安可不知所向爰志學校

祀典

民不穀則不食穀非土則不生土非風雲雷雨則不滋雲雨非山川之氣上升則不降鬼之爲厲非有所依則不息故皆壇以祀之禮有法施於民者有以死勤事者有以勞定國者有能禦大灾者有能捍大患者非崇德以報功則不義故皆廟以祀之本府舊志所載壇廟其應

朝典及禮可義起有鄉先生沒而祭于社者無庸議矣其有戾於此者一時未能考其迹之所起不敢遽削姑存之以俟後之  
崇明祀者擇焉爰志祀典

郵政

在昔聖帝明王之御天下窮民無告則先以仁政水旱阻饑則  
申以荒政死無所歸則著掩骼埋胔之令後世若漢文帝賜田  
租省繇費唐太宗置漏澤園宋仁宗減貢物孝宗行朱熹社倉  
法皆盛德舉也我

太祖高皇帝統一四海即

詔天下郡邑立養濟院立惠民藥局立義塚立預備倉以不忍  
人之心行不忍人之政無所不至  
列聖相承舉而弗替而又屢下養老恤孤蠲賦免征之

託修爲畿輔被澤尤先郡邑良有司遵行懋謹百餘年來窮民何幸焉舊志缺略前代之典固不能詳我

朝之典不一而足又有不可得而盡書者舉一二以見例可也爰志郵政

### 選舉

古之鄉舉里選尚矣而進士科起於隋盛於唐獻爲唐上州學政亦立登第者豈少其人舊志叙進士題名乃盡自宋太平興國始而不及唐何邪蓋世經五季紀載脫略不可得而詳也然見於他書雜出於金石之文間亦有可知者幸得一二安敢終沒其實至於歲貢者三舍之流也薦解者制舉之流也貢材者明法之流也又安敢不併及之雖然與選者名也懷才抱德學優而仕者實也我

國家掄才之典方隆我新安英才之出方盛視唐宋以來不侔  
矣後進者俛仰前修尚思務實以副其名可焉爰志選舉

人物

本府古黔歙地置自秦漢而前志叙先達始於南北朝若唐及  
五代亦落落如晨星然夫萬古此山川則萬古此人物梁以前  
豈無一人足稱者世遠無可考爾宋元頗盛紀載亦頗詳

國朝自洪武至成化如此其近乃有脫畧不能一一搜載則彼  
遠者無足怪矣雖然勲賢如程忠壯及我越國公諸人儒碩如  
朱晦菴胡雲峯汪環谷諸人文苑如吳少微汪藻諸人忠節如  
汪立信汪澤民諸人孝友如查道曹矩諸人皆天下之人物不  
特一郡之人物而已其他雖不克詳不害也安敢妄書而失其  
實爰志人物



## 宮室

宮室者人之所以生聚托處者也本府雖山中絕無歌臺舞榭  
池館之侈然而據林泉之勝以第宅樓觀相雄者亦比比有之  
所可慨者富或連甍接棟貧或無立錫之地爾至於爲義區以  
庇人作專構以祀先揭名扁以垂後且以自適而自警雖華陋  
不齊要之皆可道者有官君子政通人和隨宜啓創或爲退思  
之地或以表先賢之遺蹤或以廣儒生之游寓又其尤矣有合  
於此者知無不錄庶後人慕而效之不在潤屋之富而在潤身  
之德所謂斯是陋室惟吾德馨者也爰志宮室

## 寺觀

江南有寺觀始於三國吳而本府有寺觀則始於晉歷唐及宋  
元而益熾洪惟我

太祖高皇帝稽古爲治於佛老雖不廢其教而給牒度天下郡邑僧道則有定額未嘗少濫洪武二十四年又下歸併之令合數寺觀各立一叢林且嚴私創菴院之律故本府寺觀并仍前代之舊未嘗少有私創者其名旣登載于

大明一統志今苟畧之則無以見前代之濫而我朝之正矣爰志寺觀

祥異

傳曰和氣致祥乖氣致異人事感於下則天變動於上蓋天道曰陰陽地道曰柔剛人道曰仁義究極言之天地人之道一陰陽也郡邑吏民戴天而履地率仁由義則陰陽之氣和不仁不義則陰陽之氣乖祥異之至豈無其故彼有關於氣數之大非人所能致者修仁義以應之可也徒諉諸天則春秋有蟻無水

大雨雪大無麥禾與夫有年大有年西狩獲麟之類不必書矣  
郡志既畧縣志亦各不一是宜表之以爲畏天道修人事者之  
勸爰志祥異

詞翰

本府山川人物城池宮室與夫政化風俗之不一在昔及今凡  
經本郡先達及外郡士所品題著述者廣矣舊志以宋有郡士  
姚源等新安廣錄及廣錄續編潘巖肖紫陽名公文海天琛元  
有江遜徽風

國朝有金德珏新安文集蘇大新安文粹及各名家多有全集  
行於世故不復載然各本互有遺漏而諸作有據理之正紀事  
之的不爲浮誕麗語足以羽翼乎斯志者茲不得不類載一二  
以備考證蓋所取在其實不在其文非敢以爲拔其尤也欲專

論文者自當於廣錄等編并近日程學士敏政新安文獻志中求之爰志詞翰

### 拾遺

凡物之遺者拾之皆可以資用况事有關於郡乘者乎地理食貨封建職制公署學校祀典郵政選舉人物宮室寺觀祥異詞翰既皆以類而志之矣其有出於前人之所錄今人之所傳而不可以類分者非一也宋羅願曰曆有歸餘筮則歸奇雜說不齊篇末總之亦可以視觀斯言得之矣爰志拾遺

### 賀鼎侯應

### 朝還任序

弘治壬戌適天下諸司府州縣三年一朝之期吾婺源聶侯廷器以去冬十一月先期北上既竣事逾年春三月望後始還邑

縉紳士喜其來迎賀之謂余宜有文余曰述職人臣常事也雖僕僕往返未足爲勞諸君第舉酒以敘間闕可矣奚以文爲愈曰侯之還有所可賀者焉我

國家三年一朝視周制五年雖少異然而兼舉黜陟之典卽周禮所謂三歲大計群吏之治而誅賞之實榮辱之所關也侯之此行六事克稱聲價琅琅部院大臣雅重之疏其名在當陟之列綸音褒敕暫仍民社之寄可謂榮矣惡可以不賀哉縣丞天津顏君廷佐與侯同憲同德主簿漢川謝君奎燦典史餘姚陳君質中亦皆侯之所重並資薦達名位克全是侯之榮光及僚案爲快賀所以爲顏君輩賀也邑民服侯之德化非一日聞侯復來強壯者無慮數十人奔迎千里外父老扶杖屨於埭城之下兒童騎竹馬於星渚之東侯皆慰而遣之如慈父母之見其

予歡聲載道是侯之榮光及百姓爲侯賀所以爲斯民賀也  
壁或老於林下或閒於仕牒又得與侯時相往還以聆德政餘  
論爲侯賀亦所以自賀也賀不以文何以紀其榮而盡其情哉  
予於是復之曰諸君之爲賀善矣予之所以爲侯賀又有不同  
者焉侯出自賢科令此劇邑治行卓異足爲江東百城之表巡  
撫大臣及觀風繡使並剡薦之去秋考績旣獲最書今茲應朝  
其榮又如此陟崇階而去可數日待然而僚寮百姓及諸君愛  
戴之情無窮也曰清慎勤曰愷悌曰忠厚能一如初至使百里  
之地得淹驥足一日則被一日之化得淹一月則沐一月之澤  
而他日攀轅卧轍之送過於今日望塵下拜之迎是又大可賀  
矣所謂不以頌而以規乃所以爲賀也諸君曰然遂書之以竢

休寧西門汪君慎績學祇行士也自號曰守約其邑程篁墩內翰爲大書二字于冊繼以詩有云三省貴知要一儉更師古金陵沈仲律憲副詩又云毋寧巧寧拙毋寧浮寧朴君猶未以爲足復徵其說於予予曰憲副蓋取法乎聖人答林放問禮之本之意內翰則欲君爲曾子之守約而兼乎儉也聖人嘗言以約失之者鮮矣先正釋之曰不侈然以自放之謂約又曰凡事約則鮮失非止謂儉約也以是求之則內翰之期君意尤切至此二詩之作有裨于君之冊誠多矣予復何說哉雖然能約固難約而能守尤難一動一靜一語一默始終不出乎規矩準繩禮義廉耻之外謂之守約乃可若今日循規蹈矩明日滅準背繩今日遵禮由義明日喪廉忘耻謂之守約則不可如守器物如守城池惟恐其或失一髮一息弗敢少渝所謂終身行之是也

君能顧名思義確有恒心如是則內翰憲副之詩不爲虛予之說亦不爲贅矣不然是冊不過爲觀美之具無用也君遂請書其說爲詩序蓋君與予同出唐越國公有宗祊好故予不覺告之直而君不覺聽之深也續有作者其意亦必不外乎此弘治壬戌六月之吉序

### 南園詩序

南園詩者諸縉紳爲南園對老作也野老姓徐氏名棖字德正南昌之進賢人其先出漢南州高士穉今爲雷岡土著大姓勝國時紅巾陷江西屬縣有彥思者出家貲僞衣裝器械率衆禦賊以全鄉里野老之曾大父也大父遵有父孟倫世有隱德野老自幼穎敏過人端重簡默行義重於鄉閭初有志爲世用業舉子弗利場屋中遂棄去乃大肆力于諸子百家之書文章足



爲後進師範以紙上陳迹爲未足遍遊淮泗間訪古討幽兼覽  
江湖之勝由是聞見益博聲聞益著晚築室于家之南園琴於  
是棋於是詩酒於是圖書於是憲草不除藥欄不設果不成列  
花不成畦竹木錯雜隨地所宜不問其類誠有司馬公獨樂園  
花竹秀而野之趣因以南園野老自號鄉之人無間旌倪亦合  
辭一稱之野老年今七十有七子四皆讀書守禮仲曰炯領弘  
治乙卯鄉薦野老不以其名遂爲喜及上禮部中乙榜司訓于  
績溪野老亦不以其官冷爲戚一切浮沉得失不以經心類如  
此若是詩之作絲緒縉紳高其義而咏嘆之炯則從而裒集之  
野老亦非汲汲於是者易蠱上九曰不事王侯高尚其事賁六  
五曰賁于丘園語曰先進於禮樂野人也若野老可謂高尚其  
事而賁于丘園者矣可謂先進之野人矣其爲南州高士後也

何忝第愧余在江西臬司者凡七載野老未嘗求見不得爲野  
老特設一榻使余有系於陳蕃爾去歲同州纂修徽州府志獲  
觀是詩喜太平之世有野老之爲人故爲序其首簡用字世明  
耿介博洽騁駿而用不愧于野老之家學云弘治壬戌秋九月  
望後三日序

### 同慶雙壽序

壽之爲言久也人生以百歲爲期然而不可期也六十曰下壽  
視期已強半可以言壽矣亦可以言慶矣矧同慶雙壽者乎郡庠  
掌教三山朴菴黃君文潔前戶部尚書耻齋先生猶子也以今  
年六十有五厥配鄧年躋六十館下諸生僉議徵言賀之許生  
文達王生曷吳生儒莊生瑄四君子者實爲壽儔而近生洪先  
期以書來告其余甥也君於余又有斯文之雅惡可以無言余

同君纂郡志開局紫陽觀者半載見其爲人簡重寡默學博  
而持之若淺才贍而用之若拙其所以教諸生者不疾不徐一  
引之於規矩準繩之地故諸生多所造就聞厥配亦慈柔聰慧  
以女紅固不臻其妙而孝敬勤儉克主中饋尤爲遠近所稱與  
君並首堂上精力不減于少壯此皆必得其壽之徵也百歲之  
期可謂至矣今日雙壽云乎哉矧君久居清秩伉儷偕榮二千  
石俱克幹蠶二女俱適名家由茲而後位益崇福益盛得以  
安享於太平之世則人之所以慶之者益至矣今日同慶  
云乎哉詩曰壽考維祺介尔景福余姑爲君雙壽者誦之又曰  
爲此春酒以介眉壽余姑爲諸生同慶者誦之不識以爲然否  
弘治癸亥春二月二十二日序

雙壽者迪功郎致海鹽丞事任丘誠齋鄭先生及其配尹孺人同躋八十也圖之者先生之子徽州府同知君璠幸二大人壽而志其慶也詩之者士林群彥樂先生伉儷之壽而慶同君之壽也其初度辰先生在歲之某月某日孺人在某月某日諸子珣珣琚琮諸孫三十有二人皆綵侍左右惟同知君與其仲登封知縣君珩莫與捧觴之列翹首北望不勝狄公望雲之情此圖所以作也詩傳圖末通判睢陽陳君性之以詩爲未盡又屬舜民爲之序將俾同知君寓歸任丘以爲其慶頌舜民嘗爲先生賦齊壽堂詩矣鄙意亦有未盡者何以言之壽之爲言久也謂久生於世也人生百歲爲期杜詩以七十爲古來稀則八十爲尤稀矣故八十之壽一郡見者百或一二焉一邑見者千或一二焉一鄉一家見者萬或一二焉不惟少見而見者又

或昏庸困窘瘝寡獨無足齒矣矧伉儷無恙身嘗躋臚仕德  
足以及人子孫又接踵貴盛而偕老于一堂者乎若先生與孺  
人可謂人瑞矣推原其故任丘爲河間名邑東瀕滄海西麓太  
行當九河之會密邇京師氣數完聚先生生乎其間早以奇才  
淹于場屋卒繇胄監發身其在海鹽也多仁民之政旣而引年  
林下忠信慈祥化及鄉里孺人又貞靜淑惠善于內助此皆必  
得其壽之徵也其所以保艾爾後而垂厥衍慶于無窮者夫豈  
人之所可及哉又豈但百之一二千之一二萬之一二而已哉  
同知君與知縣君並以名進士爲民父愛清譽美政播于海內  
崇階茂績方進未已他日

龍章鳳詔之榮可不次拜受先生與孺人同聞此消息而玩此  
圖會喜歌者歌此詩雖遠數千里其與之歡愉下而彼此一致

也夫如是則先上與儒人心益寬氣益和福壽益高且隆樓指期願之年同知君當再繪黃眉探桑之圖陳君與群彥當再賡大保之詩舜民又當再效華封人之祝爲序以獻亦豈但今日之圖之詩之序而已哉姑泚筆以頌弘治癸亥三月之吉

傅家錄後序

傅家錄一帙凡十有四卷欽棠越鮑君以潛手集其先世行實遺文與夫諸縉紳之題詠贊頌者也先是既得篋墩程學士先生爲之彙次且爲之序又得地官關西李君獻吉爲之校正矣一日復介其弟以道持以謁余請序其後余受而覽之則爲之嘆曰鮑氏文獻盡在茲乎何其錄之富也若傅叔子壽之慈孝義動盜賊若仲安之通經尚義克復朱文公廟田皆名重天下古今鄉人所共仰者其諸宦業之著若國良若尚聚若良用學

識之優若景文若伯原若伯尚若尚敬若廷謚及其子泰負母  
避兵若和叔建策救荒獲種竹之報若以重捐地建里社若汝  
欽及必成寶重祖先遺墨若宅相木榻勤儉若景曾鑒學若時  
憲義行若時瑩而仲安伯原伯尚又嘗建塌以興水利立社倉  
以濟貧乏舉鄉飲酒禮以孝悌禮讓化率鄉人皆表表亢其宗  
者其閨壺之秀尤徃徃以節孝自立下至一堂一軒一齋之扁  
罔不近道而慶問弔祭之末亦非率爾交際者獨覩南極觀與  
心田道院二記謂所建非儒門之事然南極爲景山心田爲景  
文二墓所在故藉道流以守之初非溺於虛無也是錄一一收  
而傳之可謂傳得其傳矣後之讀者必曰此吾世德之懿也安  
敢不則而象之以求無忝所生乎夫如是則前者方徃後者又  
至所可傳者續續無窮而鮑氏之宗益昌以大有非他氏可反

矢以爲之爲此不亦賢乎余於良用有一日長而辱以潛父叔  
昆弟之愛良厚故敢歷舉其前以勉其後云弘治癸亥三月望  
壽方母鄭孺人七十序

余與監察御史同郡歛西吳君容之同生于景泰癸酉同治春  
秋經成化丁酉又同舉于鄉及各第進士占仕籍始終二十年  
間相與如異姓兄弟此心此德無不同者稔知其配方孺人貞  
靜淑慧非尋常女流可及容之夙夜在公終鮮兄弟所以維持  
家庭奉其親者皆方孺人之力也弘治丙辰容之不祿時其二  
子揖相尚在童髫歲辛酉余宅憂里居則揖已遊郡庠駁有時  
名矣余一見之益足以驗方孺人之慈訓因嘆曰方孺人如此  
其母氏之賢又當何如也今春余治裝將謁銓曹揖走書請曰  
外祖母鄭孺人出唐里大家自歸先外祖光祿署丞方公廷規



壹儀之懿真有可爲縉紳家楷範者身受

恩封諸福皆具是歲四月八日春秋躋七十二子鑲鑱俱克紹  
外祖詩禮之緒孫五人皆俊秀不凡綵侍膝下其樂融融也揖  
與相將侍吾母捧一觴于壽席先生幸畀一言以宣吾母子祝  
願至情萬惟勿靳余乃嗚然曰鄭孺人之賢雖聞之此時而所  
以預知之者久矣蓋必有是母而後有是女也貴富福壽必于  
其人天道豈少僭哉余想設悅之晨鄭孺人必曰婦人四教以  
備爲成吾女不愧于程曉之女典奚名與位皆踰其父此吳氏  
之慶也吾外孫不愧于楊嗣復之可期矣夫如是鄭孺人之心  
云胡不順順則氣和而體益康當益享遐齡於將來揖母子當  
益祝願於無已矧有鑲鑱諸子孫之盛所以奉其母之壽者又  
當無所不至也余竊其時亦當再歌南山有臺之詩以頌之弘

治癸亥三月下旬序

機線稿序

我汪氏望于新安文獻最盛若休寧西門之派其初自我大父  
徙在宋有柳塘先生者出嘗私淑于朱文公此其顯顯者柳塘  
而下若璜隱若稱隱若履尚若養晦諸宗老累世相承各有著  
述新安文獻志所紀可考也近世有曰以名翁者篤志力學以  
詩鳴且善琴名動一時嘗見其所作一二於文獻志中而未獲  
讀其全集弘治辛酉其孫時春持巨帙謁予曰此先祖之所著  
也以機線名此先祖之自道也遺稿散逸存者無幾時春用是  
懼搜集得此將刻梓以圖不朽辱在宗盟敢求校正而序之可  
乎余嘗怪世人之詩闢巧爭奇雕刻殊甚至有句鍛月鍊以求  
一字之工古詩三百篇所以不可尚者溫柔敦厚以道性情而

已豈其貴於此哉今觀翁之詩不必工不必不工而佳句時出  
流於肺腑雖未敢必其有三百篇之風亦庶幾克紹乎柳塘之  
緒餘而無忝乎吾宗之文獻矣余生也晚弗及登翁之壇而與  
聞乎敲推之妙獲觀茲稿不啻百尺之絲有非襍線之名所可  
擬者謹正其魯魚亥豕而彙次之爲卷者五後之人傳而誦之  
則所謂百世之長者翁有之矣時春能表章其祖之遺稿如此  
非仁人孝子之用心也邪故敢併著其善弘治壬戌人日序

用拙齋存藁序

用拙存藁者浙江等處提刑按察司僉事汪公仁夫所作也公  
旣沒十餘年其子涇沂等蒐摭殘草手自謄識僅得諸體詩及  
文若干首蓋公平日之作多不存藁此其什一也弘治辛酉子修  
郡志開局紫陽觀沂以郡庠生與馬閻出示子請校正序之牘

圖入梓嗚呼涇沂輩可謂孝矣予與公居同郡出同姓官同時  
交同心序奚可辯公起成化壬辰進士拜行人奉使有聲及遷  
監察御史轉前秩並克振風紀爲時名臣中外有識者方以公  
輔期之竟未究其用以終惜哉夫詩與文乃言之宣于外者末  
也而有本焉孔子曰有德者必有言以其有本也故古人之詩  
與文根乎性情之真發於義理之正雖若拙而不工簡而不華  
然玩之而味永索之而意長後之作者留連光景徒以藻繪詞  
章爲務則工巧雖有餘而實德微矣今公之詩與文尚和平雅  
澹之音默浮葩侈儷之語蓋有本之作而非如世俗之雕琢以  
爲工者觀其以用拙自號可見矣其灼然可傳也又何疑哉雖  
然此特公之緒餘爾其平生學行在士論政績在

朝廷惠澤在百姓清白在子孫其所以可傳者固不繫此然此

而不傳則涇汭等亦何以寶手澤寓孝思而盡人子之心邪涇  
善幹蠱不墜聲光汭充溫粹如良玉學充才膽綽有父風他日  
超其芳躅而過之蓋未可量也弘治壬戌冬十月既望序

送司訓王君考績之京序

予昔治春秋凡天下有以春秋得名者罔不樂聞而傾慕之在  
福建則閩縣獨稱盛焉其舉于鄉者多居首選弘治壬子閩福  
建鄉試錄則首選乃爲候官王君時已知君之拔萃矣明年茲  
以乙榜謁銓司訓于吾婺源余在江西聞之不勝爲同學諸  
慶幸及君坐臯比談經藝果有大過人者門人翕然宗之余弟  
濟民又持經門下君不惟教人之篤而自修益勤以精至於言  
行交際辭受取予亦不一芥苟且歲乙卯余因朝賀  
聖節過家始獲接見其儀度之整肅語言之簡當氣宇之溫潤

今人不能不相敬重所謂桂林一枝昆山片玉君有之矣時出  
西聘召典文衡取士公明大器頃論戊午秋濟民藉教誨亦幸  
領應天府鄉薦時君又典文衡于廣東令譽益熾卒酉冬援例  
再上春官雖不利以歸而此志毅然不少屈及門之士多以科  
名顯皆君造就之功也今年君秩滿九載將上其績于考功同  
官新昌陳君元輔浮梁戴君克進暨門人程世賢輩不忍於別  
先期屬文贈之予亦治裝上京師方欲求贈言於人者其何以  
贈君邪近例教職錄科目粹學行及教有成績者率擢府佐與  
州縣之正其卓異者又擬擢風憲之任以君言之正當是例無  
不得者欲爲君期之奚足輕重所期者惟隨所至而益堅所守  
但愈高心愈下與在吾婺源之日無或異發春秋之緒餘措諸  
事業轟轟烈烈使天下之人不敢以踈慵目爲教職者是則諸

君子贈言之意斯言也不惟可以贈君雖反其意以贈余可也  
君名介字節甫寶候官世家云弘治癸亥四月上旬序

送張別駕序

別駕張公一之在河間餘四載矣年六十有五疏乞致仕天官  
卿重公恬退廼列其賢勞擬加四品服色以上請

恩旨既下公衣紫橫金飄然將南還適舜民以服闋謁銓需次  
未及祠部主事王君希仁謂舜民曰公吾婺源英才也今歸矣  
其高何如其榮又何如同鄉寓都下者翹首河間倅雲在目竟  
莫一餞子盍爲贈言追送之始公與吾都憲族伯綱軒同領成  
化乙酉鄉薦舜民時年十有三已知公清修俊偉爲時名流及  
舜民忝仕籍辱教愛良厚公雖屢上春官弗利而名益彰歲甲  
辰銓試慶等授知臨城縣弘治壬子舜民自江西赴考功公已

縣志卷之八

憲慈憲及父母歲乙卯舜民朝賀

聖節北土公權知趙州庚申舜民再自雲南北土公又受

褒誥權同知河間府事每懷不得假道以請益臨城爲趙屬與

河間相望未數百里公二十年間庶以律身仁以愛民勤以濟

筆位愈勝心愈下操愈勵二郡之民感舊澤者借寇公而不可

得沐新惠者歌廉范而不能已觀風之使前後皆有剡薦名動

中外公又精力強健鬚髮黧然如少壯顧乃不屑大用而亟歸

爲蘇下之一人豈以富貴爲功名以利害爲去就者所可及邪

天官卿必有取於此矣是公之歸惟其高所以榮也贈言焉

爲公輕重昔漢侯君房去臨淮百姓攀轅卧轍不許去河間之

民於公行殆又過之第舜民淹此弗及見宋文寬夫留守西都



集洛中公卿大夫年德高者爲耆英會富彥國年七十九餘皆七十以上獨司馬君實年六十四用狄監盧尹故事亦預於會公歸倡舉之鄉民少公十有五歲正猶君實之於彥國他日繼歸或可用故事求預也敢因同鄉諸君子之意先言此以卜可否弘治癸亥重陽日序

送都綱存正序

吾新安諸寺惟水西太平爲大以其據郡西山水之勝舊有三十有六院也今存者十寺惟五明爲佳以其據披雲峯之椒俯視諸寺高而且遠也五明僧多賢信都綱者固不充稱厥職若月舟之通儒書善吟咏余聞其名未及識之若普光之真靜淳雅余嘗有贈言若泰祥之通敏博洽自號吉菴又號太愚吾書公詩似賈浪仙交際賢士大夫似文暢嘗求余書遊寺記亦嘗

不詩贈之此其元未者存正爲吉卷既成相雄儒者性穎  
悟融會宗教之言有日矣去年郟侯關西公濟物吉卷既  
不凡則存正可知特舉之使嗣其都綱之任今年遵例輸粟上  
天官吉卷亦同行真有如天性之恩者存正既拜

命授秩將奉吉卷而還過余寓館言別且請教余既贈詩又  
告之曰吾儒所學皆實理釋氏以空爲本然皆不出吾儒之範  
圍也以言五蘊則色身莫不知所以自愛愛若莫不知其難受  
樂莫不知其易受用莫不知其不可缺所想豈無其端所行豈  
無其據所識世事豈無其迹五蘊不可空矣以言四恩則父母  
之生師長之教國王之治施主之惠皆本生不可忘者四恩不  
可空矣苟一切可空今日胡爲而授秩他日胡爲而總方外之  
政師徒胡爲而相臨之有情交際胡爲而相與之有禮邪至於

三緣七業皆可空者顧反不以爲空而切切論之又何邪存正  
行矣師徒舟中再思余言到官之日所轄諸寺僧未必無一人  
知此道者試與一談使之不必求空於空惟擇三乘之旨而嚴  
五戒之行以無負

朝廷度僧設官不廢釋教之意可也存正不以余爲迂遂請筆  
之軸以去弘治癸亥重陽日序

### 贈吳縣簿序

饒陽縣簿管理易州山廠柴薪事休寧吳君以芳滿九載請休  
致未得而行裝已具適余寓都下畢上舍文中偕同郡縉紳諸  
君子高其去謂余當贈之言君爲余老友也其先出漢番君其  
遷休寧則自南唐監察御史少微始少微子鞏爲中書舍人因  
改所居石舌山爲鳳凰山其後或隱或仕代不乏人至君祖父

俱以厚德爲鄉邦所重君自幼天資端厚而敏遊邑庠有年淹  
于場屋余初業舉子時過休寧一接之頃卽辱歲愛蓋君嘗學  
春秋于大理寺正先兄春意軒其情有所自也成化庚子余爲  
行人君始貢上春官邂逅相見故人之懷藹然旣而君卒業南  
雍累科皆不利士友惜之余方繇御史遠謫不得以時與君通  
問弘治甲寅君謁銓拜饒陽之

命明年余以江西按察僉事朝賀

聖節上京師翹首易州不二三百里弗克一晤聞君幹濟公勤  
已爲總督大臣所重每檄兼收他郡柴薪及修橋梁道路處分  
皆當今秋余以內艱服闋北上益聞君宦成不怠屢考皆居優  
等真足爲本廠八府五州三十縣表率者今總督少司空德興  
張公廷式知君尤深君上書求退詩句有云宦邸白駒驚過隙

教園黃菊想荒丘張公慰留再三且旌異之命官以旗鼓送至  
邸第然君去志浩然不可遏也近又奉公來與余再叙第余有  
淮揚之

命不得少竢君行脩諸君子一餞徒能喋喋爲此言爾昔韓昌  
黎送楊少尹旣以漢二疏去位故事美之又以古之鄉先生期  
之諸君子餞君之際誦此文以代陽關之曲可矣余言奚足贈  
哉文中於君與余皆姻友也弘治癸亥十月朔日序